

Carta na seicwanom Pablo na m'aⁿ nn'aⁿ tsjoom Éfeso

¹ Ja Pablo, ee na l'ue ts'om Ty'o^oots'om, cwiluiindy^o apóstol, ñ'oomwaa' ma'moⁿna' ts'aⁿ na majñom Cristo Jesús ts'iaaⁿ 'naaⁿaⁿ. Matseicwan^oya cartawaa na m'aⁿ'yo' tsjoom Éfeso na la'xmaⁿ'yo' cwentaa' Ty'o^oots'om ndo' na cwila'y^u'yo' ñ'eⁿ Cristo Jesús. ² Nquii Tsotyaa^ya Ty'o^oots'om na cwila't'maaⁿ'ndy^o ñequio Jesucristo na cwiluiiñê na matsa^{nt}joom jaa, quiana na nnto'ñoom'yo' juu naya na laxmaⁿna ñequio juu na tjañomtiuu c'oom ts'aⁿ jo nda^ana.

Matio'naaⁿñê Cristo jaa

³ Cwila't'maaⁿ'ndy^o nquii Ty'o^oots'om na cwiluiiñê tsotype Jesucristo na matseixmaaⁿ na matsa^{nt}joom jaa. Nc'e na matseitjoom'na' jaa ñequio Cristo, jo' xjeⁿ cañoom'lueecheⁿ nc'e Espíritu Santo matio'naaⁿñê jaa ñequio cwii cwii nnom na matseixmaaⁿ na m'aaⁿ cañoom'luee. ⁴ Cwitjoocheⁿ na tqeⁿ Ty'o^oots'om tsjoomnancue, jnda tjeii'ñê jaa na nntseitjoom'na' jaa ñequio Cristo. Luaa' s'aaⁿ cha nlqueⁿna' jaa na lju'ndy^o jo nnoom, ndo' na tjaa jnaⁿ cwicolaxmaaⁿya jo nnoom. ⁵ Ee na wi' ts'oom jaa jo' chii xjeⁿ na jndyeecheⁿ tjeii'ñê jaa na nluindy^o ntseinaaⁿ nc'e Jesucristo, ee luaa' tqeeⁿ ee na ljo' l'ue ts'oom na nluui. ⁶ Tuii na ljo' cha' cantyja 'naaⁿ jo' nntseit'maaⁿ'ñena' juu naya na matseixmaaⁿ, na cwe' yu tquiaaⁿ na la'xmaaⁿya nc'e nquii Jnaaⁿ na jeeⁿ candya'

ts'oom. ⁷ Cautyja 'naaⁿl juu na jeeⁿ wi' ts'oom jaa, jo' na macwji'n'maaⁿñê jaa ee na tue' Jnaaⁿ, na matseit'maⁿ ts'oom jnaaⁿya. ⁸ Candaⁿya ma'moⁿ Ty'oⁿots'om na wi' ts'oom jaa na matseijnoⁿoⁿ n'oⁿya ndo' mañequiaaⁿ na cwila'noⁿa. ⁹ Ndo' jnda t'moⁿ ndaⁿya juu na l'ue ts'oom na wanty'iuu' tyom'aaⁿna', majuu cantyjati na jnaⁿ cha'tso na seijndaa'ñê na nncjaacandaⁿna'. ¹⁰ Juu ñ'oom wanty'iuu'ñeeⁿ ma'moⁿna' na quia nncue'ntyjo xjeⁿ nntseicandaⁿñêñ'eⁿna', matseijndaa'ñê na cha'tso na m'aⁿ cañoom'luee ñequio nnom tsjoomnancue nc'om joo jo' nacje 'naaⁿl Cristo.

¹¹ Nc'e na jnda seitjoom'na' jaa ñ'eⁿ Cristo, teiyo tjeii'ñe Ty'oⁿots'om jaa cha na nc'oomna' jaa na nndaaya cha'na na nndaⁿ jom, ndo' na nncuaa na ljo' matseiljo'yuna' ñequio na jnda seijndaa'ñê na nnts'aaⁿ ndo' cwiluiina' cha'xjeⁿ na cjaawee' ts'oom. ¹² Luaa' waa na mach'eeⁿ cha jâ nn'aⁿ judíos na ñentyjaa'jndyee n'oⁿya Cristo, catseit'maaⁿñena' Ty'oⁿots'om cantyja 'naaⁿya. ¹³ Ndo' mati 'o nn'aⁿ na nchii judíos quia na jndye'yo' ñ'oom na mayuu' cantyja 'naaⁿl Cristo, majuu ñ'oomxco naya na macwji'n'maaⁿñena' 'o, jla'yu'yo' ñ'eⁿñê, jo' na jñoom sayo 'o ñequio Espíritu Santo na tsoom na nnto'ñoom'yo'. ¹⁴ Manquii Espíritu Santo na tjameiⁿntyjee' nnom ñ'oom na cwiljotyeⁿ na maxjeⁿ nnto'ñooⁿya ljo' na ñnequiaa Ty'oⁿots'om ndaⁿya quia na jnda seicandyaañeñ'eeⁿ nn'aⁿ na nla'xmaⁿ cwentaaⁿaⁿ, cha na catseit'maaⁿñena' jom na jeeⁿ t'maⁿ cwiluiiñê.

Quiaa Ty'ooots'om na jndo' n'om nn'a^n na cwila'yu'

15 Cautyja 'naa^n nmei^n mati ja quia na mandiiya na cwila'yu'ya n'om'yo' ñequio Ta Jesús ndo' na m'a^n'yo' na wi' n'om'yo' cha'tso nn'a^n na lju' n'om, 16 tyoocjomei^nntyjaa'a na mañequiaya na quianl'uaa^n'a^n cantyja 'na^n'yo' quia na matseina^nyya nnoom. 17 Ty'ooots'om caxuee cwiluiiñê, nque^n na cwiluiiñê Tsotye Jesucristo na matsa^ntjoom jaa, maca^n'a nnoom na cantyja 'naa^n Espíritu quiaa^n na nla'nō^n'yo' ñ'oom na ma'moō^n ndaaya ndo' yati ntsata'jna^n'yo' jom. 18 Mati catseicanaa^nñê naquii' nque^n'yo' cha na nndaā nla'nō^n'yo' ljo' tseixma^n ñ'oom na cwicantyyjaa' n'om'yo' na cantyja 'naa^n juuna' maquee^nñê 'o, ndo' juu na mañequiaa^n na cwicandaa nn'a^n na laxma^n cwentaa^n'a^n, jee^n cajndana' ndo' jee^n t'ma^n tseixma^n'na', 19 ndo' mati quiaa^n na caliuuya na jee^nche^n ndya' t'ma^n waa na jnei^n. Ñequio juu najndei na matseixmaa^n nndaā nnteijnei^n jaa nn'a^n na cwila'yuu'a ñ'e^nñê. Ndo' cantyja 'naa^n juu najnei^n luaa', 20 s'aa^n na tando'xco Cristo na tue', ndo' s'aa^n na tjacjoo ntyjaa' ts'oō^n ntyjaya la'ñe^n cañoom'luee, 21 tquee^n juu na t'ma^nti cwiluiiñe nchiiti cha'tso na cwiluiitquiendye ndo' mati jo ndaa cha'tso na cwitsa^ntjom na m'a^n cañoom'luee ñequio cha'tso na waa najnda. Juu cwiluiit'ma^nñeti jo ndaa cha'tso na m'a^n je' ndo' mati 'io cha. 22 Mati s'aa^n na cha'tso nnom c'om nacje 'naa^n juu ndo' s'aa^n na juu cwiluiiñe xque^n ñ'oom jo nnom tmaa^n nn'a^n na macwji'

Ty'oots'om cwentaaⁿaⁿ, ²³ ee tmaaⁿ nn'aⁿ na macwji' Ty'oots'om cwentaaⁿaⁿ cwiluiiñena' seii' Cristo ndo' matseicandaa'ñeñ'eⁿna' jom nc'e juu tmaaⁿñeeⁿ ndo' cha'tso na niom, candaa' laxmaⁿna' nc'e Cristo.

2

Cwilui'n'maaⁿndyo nc'e na jeeⁿ wi' ts'om Ty'oots'om jaa

¹ Mañejuu xjeⁿ na tquiaa Ty'oots'om na ta'ndo' xco Cristo tquiaaⁿ na 'o tando'yo' meiiⁿ na jo nnoom tyola'xmaⁿyo' l'oo nc'e natia ñequio jnaⁿ na ñeja'xmaⁿyo', ² mati 'o ñet'om'yo' naquii' natiameiⁿ, ñesantyo'yo' ndo' ñel'a'yo' ljo' na cwil'a nn'aⁿ tsjoomnancuewaa, cha'xjeⁿ na l'ue ts'om juu espíritu na waa najndeii na m'aaⁿ naquii' jndye na maleichuu xjeⁿ 'naaⁿna' nn'aⁿ na tiñe'cal'a chiuu na l'ue ts'om Ty'oots'om. ³ Mati tiempo na jnda teinom ñeja'jomndyo naquii' cha'tso natiameiⁿ, ñel'aaya ljo' na queen n'om seii'a ndo' ñeja'candaⁿndyo ñ'omtiuu 'naaⁿya. Ndo' na ljo' ñel'aaya, juu na matseiw'iityeⁿ Ty'oots'om nn'aⁿ laxmaaⁿya na cat'uiina' jaa cha'xjeⁿ na nnt'uiina' nt'omcheⁿ. ⁴ Saa jeeⁿcheⁿ ndya' wi' ts'om Ty'oots'om jaa. T'maⁿ waa na candya' ts'oom ñ'eⁿndyo, ⁵ ee xjeⁿ na ñet'ooⁿya na l'oo nc'e jnaaⁿya, xjeⁿñeeⁿ tquiaaⁿ na tandoⁿxcooya quia na tquiaaⁿ na tando'xco Cristo. Ndo' na ljo', nc'e naya na matseixmaaⁿ, jo' na cwiluii'n'maaⁿndyo'. ⁶ Ndo' na tyolaxmaaⁿya l'oo tquiaaⁿ na tandoⁿxcooya ñequio Cristo Jesús, ndo' s'aaⁿ na cwimeinⁿdyuaandyo ñ'eⁿñe cañoom'luee. ⁷ Luaa' s'aaⁿ cha xuee na cwiwjaana' m'moⁿna'

na juu na m'aaⁿ na jnda ntyjeeⁿ jaa, jeeⁿ cajnda tseixmaⁿna' ñequio juu naya na matseixmaaⁿ nc'e Cristo Jesús. ⁸ Nc'e naya 'naaⁿl Ty'oots'om na cwe' yu, jo' chii cwicaluii'n'maaⁿndyo' ee na cwila'yuy'a' n'om'yo' ñ'eⁿñê. Meiⁿ nchii laxmaⁿyo' na ljo' nc'e cwii na jnda l'a' ncjo'yo', laxmaⁿyo' naljo' nc'e mach'eeⁿ na cwicanda'yo' juuna'. ⁹ Nchii cwe' waa na jnda s'aa ts'aⁿ jo' na cwilui'n'maaⁿñê, cha nntseicu'na' na nntseis'añe cheⁿnqueⁿ. ¹⁰ Ee cwiluiindyō ts'iaaⁿ na mach'ee Ty'oots'om. Jnda tqueeⁿxcoom jaa cantyja 'naaⁿl Cristo Jesús cha na cal'aaya cha'tso nnom na maty'iomyana' na ndyu'ñeeⁿcheⁿ seijndaa'ñê na cal'aaya.

Cwiljoyaandyō ñ'eⁿ Ty'oots'om nc'e na tue' Cristo

¹¹ Jo' chii cjañjoom' n'om'yo' chiuu ñejla'xmaⁿyo' cwiitjoocheⁿ na cwila'yuy'yo'. 'O nchii tsjaaⁿ judío 'o ndo' nc'e naljo' joona na cwil'ana 'naaⁿ ntjaaⁿ yo'ndaa ndana na naⁿnom, cwiluena na 'o tila'xmaⁿyo' cwentaa' Ty'oots'om nc'e na tiquil'a'yo' naljo'. ¹² Tiempo'ñeeⁿ nchii cantyja 'naaⁿl Cristo ñet'om'yo', ñet'om'ndyo'yo' cantyja 'naaⁿ nn'aⁿ Israel, ee watoⁿl tyom'aⁿyo' cantyja 'naaⁿl ñ'oomtyeⁿ na seijndaa'ñe Ty'oots'om ñequiondye joona, ndo' mati ñ'oom na tsoom ndaana na nnts'aaⁿ. Xjeⁿl'ñeeⁿcheⁿ meiⁿ ticantyjaa' n'om'yo' jom, meiⁿ na nnc'om'yo' cantyja 'naaⁿaⁿ. ¹³ Saã je' je' tjoom' m'aⁿyo' ñ'eⁿ Cristo Jesús. Jo' chii 'o na ñet'om'ndyo'yo' ñ'eⁿ Ty'oots'om jnda seicandyoo'ñena' 'o cantyja 'naaⁿaⁿ nc'e na tquiaañe Cristo na tueeⁿeⁿ cwenta'yo'. ¹⁴ Ee Cristo

cwiluiñê na cwiljoya n'ooⁿ já nn'aⁿ judíos ñequio 'o na nchii jo' cwiluiindyo'. Jom s'aaⁿ na ñecwii tmaaⁿ laxmaaⁿya na ñet'ooⁿya na we tmaaⁿ jaa, ee seityueeⁿeⁿ juu na ñet'ooⁿ na wjeendyo ntyjaaⁿ cwii na cha'cwijom tatiom na ñetoⁿ'na' jaa.

¹⁵ Ñ'oom na tqueⁿ Moisés jndye nnom tyoqueⁿ'na' xjeⁿ nn'aⁿ. Saaⁿ cantyja na tue' Cristo seintycwiina' najndeii na tyotseixmaⁿ ñ'oom'ñeeⁿ. S'aaⁿ na ntycwii jo' cha we ntmaaⁿ'ndyo nncwil'uee'ñê na nnts'aaⁿ cwii tmaaⁿ xco na tjoom' m'aaⁿya cantyja 'naaⁿ'aⁿ. Laa'ti' waa na seintycweeⁿ na ticuee' n'om nn'aⁿ cwii cwii tmaaⁿ nc'iaana.

¹⁶ Nc'e na tue' Cristo nacjoo' ts'oom'naaⁿ jo' na seintycwiiñ'eeⁿ na m'aⁿ'ntiaa'ndye we ntmaaⁿ nn'aⁿ, s'aaⁿ na ñecwii tmaaⁿ joona, ljoyaandyena ñ'eⁿ Ty'oots'om.

¹⁷ Jndyo Cristo na jndyonquiaaⁿ ñ'oom xco na mach'eena' na cwintycwii tia' quii'ntaaⁿ 'o nn'aⁿ na tquia ñet'om'yo' cantyja 'naaⁿ Ty'oots'om, ndo' mati quii'ntaaⁿ já nn'aⁿ judíos na candyoo'ti ñet'ooⁿ'yâ cantyja 'naaⁿ'aⁿ. ¹⁸ Nc'e cantyja 'naaⁿ Cristo jo' na meiiⁿ we ntmaaⁿ jaa, wanaaⁿ na nntsaquiaaⁿ'a na m'aaⁿ Ty'oots'om, cwiluii na ljo' nc'e Espíritu Santo.

¹⁹ Jo' chii 'o nn'aⁿ gentiles tacola'xmaⁿ'yo' nn'aⁿ na cwe' cwiquieya cwii tyuaa na nchii jo' tuiindyo'. Xeⁿ nchii je' je' mañecwii xjeⁿ cwiluiindyo' ñequio tmaaⁿ na cwiluiñê cwentaa' Ty'oots'om, cwiluiindyo' nn'aⁿ na ñecwii w'aa 'o, ndo' ñequii 'ñeeⁿ ntseinda 'o.

²⁰ 'O cwiluiindyo' cha'cwijom w'aa na jnaⁿ'na' nacjoo' ts'iaⁿ'tsjo', na tacatyeeⁿ nacjoo' ñ'oom na tyoñequia apóstoles ñequio profetas. Manquiti Jesucristo cwiluiñê tsjo' nqui w'aa'ñeeⁿ.

21 Cristo cwiluiiñê tsiaⁿtsjo^lñeeⁿ. Nacjoo' juuna' cha'waa w'aañeeⁿ cwijom wjaacandaa'na' hasta na ncue'ntyjō na nluiiñena' cwii wats'om na lju' cwentaa' Ta Ty'oōts'om. 22 Jo' chii cha'tsondyo' 'o na seitjoom'na' ñ'eⁿ Cristo matseitjomna' 'o ñ'eⁿ nc'iaa'yo' na cwiluiindyō' cwii w'aa yuu na nnc'oomñe Ty'oōts'om nc'e Espíritu Santo.

3

Toñom Pablo ts'iaaⁿ na nnts'aaⁿ

1 Jnaaⁿl ñ'oommeiⁿl, jo' na ja Pablo m'aaⁿya praso cantyja 'naaⁿl Cristo Jesús cha cateijndeina' 'o nn'aⁿ gentiles, 2 Nc'e na jeeⁿ yañe Ty'oōts'om, matsona' na manquiuyō' na tquiaaⁿ ts'iaaⁿwaa na cats'aaya juuna' naquii'ntaaⁿyo' cha na cateijndeina' 'o. 3 Ee t'mōōⁿ noōⁿya ñ'oom na jeeⁿ wanty'iuu' ñetuaa chiuu jndā seijndaañê, ndo' tquiaaⁿ na catsei'noⁿa juuna'. Chjoowi' ñ'oomñeeⁿ jndā seiljeiya na matseicwanōⁿya na m'aⁿyo'. 4 Quia nla'naⁿyo' juuna' quia jo' nla'noⁿyo' na matsei'noⁿa ñ'oom na wanty'iuu' ñetuaa cantyja 'naaⁿl Cristo. 5 Juu na jeeⁿ wanty'iuu' ñetuaa tñquiaa Ty'oōts'om na nliu nn'aⁿ na ñet'om teiyo juuna', cha'xjeⁿ je' ñequio Espíritu Santo jndā t'mōōⁿ ndaaⁿ apóstoles na lju' n'om ñequio profetas. 6 Luaa waa ñ'oom na wanty'iuu' ñetuaana': Nn'aⁿ na nchii judíos joona, juu na nnts'aa Ty'oōts'om na nndaa nn'aⁿ judíos, mati nnto'ñoomna. Matseitjoom'na' joona ñequio seii' Cristo, mati mañ'oomna' joona naquii' ñ'oom na tso Ty'oōts'om na nnts'aaⁿ cantyja 'naaⁿl Cristo Jesús.

7 Macantyja 'naaⁿl ñ'oomwaa' jo' na s'aa Ty'o^oots'om na jndaya na mañequiaya juuna' ndaa nn'aⁿ, ndo' tq^uiaaⁿ najndeii na matseixmaaⁿ na ñ'eⁿ mats'aaya tsiaaⁿwaa'. 8 Quii'ntaaⁿ cha'tsondye nn'aⁿ cwentaa' Ty'o^oots'om na tit'maⁿ cwiluiindy^e, cantyja 'naⁿya, ja tit'maⁿndyoty^a, nchiiti joona. Saa meiiⁿ na ljo', no^o ja tq^uiaaⁿ ts'iaaⁿ na catseicandiiya nn'aⁿ na nchii judíos na cha'tso na matseixmaⁿ Cristo jeeⁿ cajndana' meiⁿ xocanda^a nntsei'noⁿl ts'aⁿ. 9 Ndo' ty'oom ts'iaaⁿ ja na cats'aaya na c'ooliu nn'aⁿ chiuu nncwji'n'maaⁿñê 'o nn'aⁿ na nchii tuiindy^ol judíos. Quia na jnaⁿjndyeecheⁿna' na s'aa Ty'o^oots'om cha'tsoti na maniom seijndaa'ñê na luaa' nncuaa, saa hasta quia je'cheⁿ matseicanooⁿ na ljo', 10 cha cantyja 'naaⁿl juu tmaaⁿl nn'aⁿ na macwji' Ty'o^oots'om cwentaaⁿaⁿ cha'tsondye na cwiluiitquiendye na m'aⁿ cañoom'luee ñequio cha'tso na cwitsa'ntjom jo' jo', caliuna na jndye nnom na jndo' ts'om Ty'o^oots'om. 11 Ty'o^oots'om s'aaⁿ cha'tso nmeiⁿl cha'xjeⁿ nqueⁿ jnda seijndaa'ñê na ticantycwii na l'ue ts'oom na nncuaa, ndo' seicanda^añêna' naljo' ee Taya Jesucristo. 12 Ndo' nc'e na cwila'yuy^a n'ooⁿ ñ'eⁿ Jesucristo ndo' cwicantyjaa' n'ooⁿya jom, jo' na matseicanaaⁿñêna' na cwila'candyoo'ndyo na m'aaⁿ Ty'o^oots'om. 13 Jo' chii macaⁿa ndaa'yo' na tintsei'ndaa'na' nquiuy^ol nawi' na matjoⁿya cantyja 'naⁿyo' ee na ljo', matseit'maaⁿñêna' 'o.

Cristo candya' ts'oom jaa

14 Macwe' jo' na maco'a xtyaya jo nnom Tsotye Taya Jesucristo, 15 na cantyja 'naaⁿl jom

cha'tso yo na m'aⁿ cañoom'luee ñequio yo na m'aⁿ tsjoomnancue, cwilcwii'na xueⁿeⁿ na cwiluiiñê Tsotyena. ¹⁶ Nquii Tsotyaaaya waa na jeeⁿ cajnda na tjaa ljo' cwii macaⁿna' na matseixmaaⁿ. Macaⁿa na cantyja 'naaⁿ joona', naquii' n'om'yo' ññequiaaⁿ na nnaⁿndyo' ndo' nla'xmaⁿ'yo' najndeii na cwiluiiñê nc'e Espíritu, ¹⁷ cha nnda^a nnc'oomñe Cristo naquii' n'om'yo' nc'e na cwila'yu'ya n'om'yo' ñ'eñê cha caljotyeⁿ na m'aⁿ'yo' naquii' na m'aaⁿ Ty'o^ots'om na wi' ts'om 'o, cha'xjeⁿ njoom ty'e nch'ioo' ts'oom. ¹⁸ Mati macaⁿa nnom Ty'o^ots'om na cala'noⁿ'ya'yo' ñequio cha'tsondye nn'aⁿ na cwila'yu' cwanti na t'maⁿ na m'aaⁿ Cristo na wi' ts'oom nn'aⁿ, ndo' na tco, ndo' na njoom, ndo' na ndye. ¹⁹ Juu na m'aaⁿ Cristo na wi' ts'oom 'o luaa, macaⁿa na cala'noⁿ'yo' na waljoo'cheⁿ na t'maⁿna', ndo' na luaa' nla'noⁿ'yo' jo' na nnc'om'yo' na chawaañ'eⁿ naquii' n'om'yo' m'aaⁿñe Ty'o^ots'om.

²⁰ Catseit'maaⁿñena' Ty'o^ots'om na jom jndyeti nnda^a nnts'aaⁿ nchii cwe' cha'xjeⁿ cwitaaⁿ jaa meiⁿ nchii cwe' cha na cwila'tiutyaaaya ndo' na mateijneiⁿ jaa nc'e najndeii na matseixmaaⁿ m'aaⁿna' naquii' n'o^oya. ²¹ Jom catseit'maaⁿñena' naquii' tmaaⁿ nn'aⁿ na macwji' Ty'o^ots'om cwentaaⁿaⁿ nc'e Cristo Jesús cha'tso ndyu ndo' cha'waati xuee na cwii wjaatina'. Amén.

4

Tjoom' m'aⁿ'yo' nc'e Espíritu Santo

¹ Ja m'aaⁿya w'aancjo jnaaⁿ na cwiluiindy^o ts'aⁿ na m'aaⁿñe cantyja 'naaⁿ Jesucristo, mats'aaya

ty'oo ndaa'yo' na c'om'yo' quii'ntaaⁿ nn'aⁿ cha'xjeⁿ
 na macaⁿna' na c'om nn'aⁿ na maqueeⁿñe
 Ty'o^ots'om cwentaaⁿaⁿ ee mancjo'yo' jo'.
 2 C'om'yo' na nioom' n'om'yo' ndo' yann'aⁿndyo',
 c'om'yo' na t'maⁿ n'om'yo', canaⁿndyo' ñ'eⁿ
 ncl'iaa'yo' ñequio na wi' n'om'ntyjee'yo'. 3 Ñequio
 na mateijndeii Espíritu Santo 'o, calajnda'yo' na
 ñecwii n'om'yo' ñequio nn'aⁿ na cwila'yu' nc'e
 na matseitjoom'na' 'o na ya m'aⁿyo' ñequiondye
 joona. 4 'O nc'e Cristo ñecwii sei' cwiluiindyo'
 ndo' ñecwii Espíritu Santo na m'aaⁿñê naquii'
 n'om'yo', cha'xjeⁿ jnda tqueeⁿñe Ty'o^ots'om
 'o na ñecwii waa na cwicantyyaa' n'om'yo',
 5 m'aaⁿ ñecwiiñe Jesucristo na cwiluiiñê na
 matsa'ntjoom, ndo' ñecwii na cwila'yu'ya n'o^oya
 ñ'eⁿñê, ndo' ñe'cwii na cwileits'oomndye nn'aⁿ
 cantyya 'naaⁿaⁿ, 6 ndo' m'aaⁿ ñecwii Ty'o^ots'om
 na nqueⁿ cwiluiiñe Tsotyaaⁿya na cha'tsondyo,
 jom cha'tso matsa'ntjoom ndo' mach'eeⁿ ts'iaaⁿ
 'naaⁿaⁿ naquii' n'o^oya ndo' m'aaⁿñê jo' jo'.

7 Cwii cwiindyo cantyyati na jnda jndaa' nnom
 Cristo na 'naaⁿ ts'iaaⁿ na matseixmaⁿ, cantyyati jo'
 naya na maco'ñom. 8 Nc'e na luaa' jo' matso ñ'oom'
 Ty'o^ots'om na teiljeii:

Quia na tjawaaⁿ cañoom'luee jnda na tando'xcoom
 na tueeⁿeⁿ,
 tjachom cha'tso joo na ñet'om nacjoom'm,
 ndo' ndaaⁿ nn'aⁿ tquiaaⁿ cwii cwii nnom na
 'naaⁿna.

9 ¿Ljo' ñe'ca'moⁿna' na matsona' na tjawaaⁿ?
 Matsona' naljo' ee najndyee jndyocueeⁿ nnom
 tsjoomnancuewaañe. 10 Jom na jndyocueeⁿ
 majuutyeeⁿ tjawannaaⁿaⁿ cañoom'luee cha na

cha'tsoti na niom, candaꞗ' ma'moⁿna' na m'aaⁿñê.
 11 Ndo' manquiiyeeⁿ tquiaaⁿ na nt'om nn'aⁿ
 cwiluiindyē apóstoles. Nt'om cwiluiindyē nn'aⁿ
 na cwit'mooⁿ ñ'oom cantyja 'naaⁿaⁿ cha cala'yu'
 nn'aⁿ. Nt'om cwiluiindyē na cwiñe'quia ñ'oom
 xco na ya cantyja na nlui'n'maaⁿñê ts'aⁿ, ndo'
 nt'om cwiluiindyē na cwitei'x'ee ntmaaⁿ nn'aⁿ na
 macwji' Ty'oo^ts'om cwentaaⁿaⁿ ndo' nt'omcheⁿ
 cwito'ñoom na 'naaⁿ na cwit'mooⁿ ndaaⁿ nc'iaa.
 12 Luaa' s'aa Cristo, jo' na ya tei'naaⁿ nn'aⁿ na
 cwila'xmaⁿ cwentaaⁿaⁿ na nl'ana ts'iaaⁿ na
 macaⁿna' cha na nncjaawijindyēendyē nn'aⁿ
 na nnc'om cantyja 'naaⁿaⁿ, 13 hasta xjeⁿ na
 nncue'ntyjo na cha'tsondyo tjoom' nnc'ooⁿya na
 cwila'yu'ya n'ooⁿya ñ'eⁿñê ndo' na candaꞗ'ya na
 cwita'l'naaⁿa nquii Jnda Ty'oo^ts'om. Ndo' na ljo'
 nlaxmaaⁿya nn'aⁿ na jnda tquiee n'om na candaꞗ'
 nntseijomna' jaa cantyja 'naaⁿ Cristo. 14 Quia jo'
 taxocatseijomnnda'na' jaa cha'na yocanch'u na
 tiyo yo cwila'chuii' chiuu waa na m'aaⁿ n'om.
 Meiⁿ taxonquiandyo na nleichuuna' jaa cantyja
 'naaⁿ ñ'oom xco na cwe' cantu na cwiñe'quia
 nn'aⁿ na jeeⁿ jndo' n'om na joo ñ'oom'ñeeⁿ
 cwi'oochoondyena' nn'aⁿ nato na tixcwe. 15 Quia
 jo' nc'e na wi' n'ooⁿya nn'aⁿ, calanaꞗⁿya ñ'oom
 na mayuu', matsona' na catsanajndaꞗya cantyja
 'naaⁿ cha'tso nnom chiuu waa na m'aaⁿya nc'e
 na matseitjoom'na' jaa ñ'eⁿ Cristo na cwiluiiñê
 xqueⁿ tmaaⁿ jaa na laxmaaⁿya seiiⁿeⁿ. 16 Ndo'
 cantyja 'naaⁿ Cristo, jaa na cwiluiindyo seiiⁿeⁿ,
 matseijomna' cha'na tjacañjoom'ñe seii' ts'aⁿ, ndo'
 juu jo' quia ya t'uii'na' ñequio cwii cwii nnom
 na tjacañjoom'ñe ts'aⁿ, quia jo' tjoom' m'aaⁿna',

ndo' nc'e jo' ya wjanajndeii juuna'. Ndo' jaa na cwiluiindyō seiiⁿeⁿ, nntsawijndaaya na wi' n'ōōⁿya nn'aⁿ.

Cwiluiindyoxcoo na cwila'yuu'a ñ'eⁿ Cristo

¹⁷ Jo' chii nc'e nguui Ta Jesús matsa'ntjoom jaa, luaa ñ'oom na matsjoo ndaa'yo'. Tsacwi'ntyje'yo' na matseijomna' 'o cha'na nn'aⁿ na tyootioondye l'ō Ty'ōots'om. Ee joona m'aⁿna ñomtiuu 'naaⁿna na cwe' ts'iaaⁿndyo joona'. ¹⁸ Ee juu na cwila'noⁿna matseijomna' cha'cwijom na jaaⁿñe. Ee juu na wando' Ty'ōots'om ticuaana' ñ'eⁿndyena ee ticala'noⁿna cantyja 'naaⁿaⁿ nc'e na quie' n'omna. ¹⁹ Jnda s'aana' na tajnaaⁿtona natia na cwil'ana, cwiñequiandyena nnom ljo' na queeⁿ ts'om seina cha ñequio na neiiⁿna nndaā n'l'añ'eⁿna cha'tso nnom ljo' na ticaty'iomyana'. ²⁰ Saa 'o nchii luaa' waa ñ'oom na tyot'mōōⁿ nn'aⁿ cantyja 'naaⁿl' Cristo ndaa'yo', ²¹ xeⁿ na mayuu' jndye'ya'yo' ñ'oom'm ndo' jla'noⁿyo' na ñ'oom na mayu'cheⁿ juuna', ²² quia jo' cantyja 'naaⁿl' chiuu waa na ñet'om'jndyee'yo', catjei'ndyo' cantyja 'naaⁿl' natia na ñeseiqueeⁿ ts'om seii'yo' ee juu jo' tseixmaⁿna' cwii na jnda tei'ndaa'ñ'eⁿ na joo natia'ñeeⁿ cwinquio'nn'aⁿna' ts'aⁿ. ²³ Macaⁿna' na cala'xco'yo' cantyja 'naaⁿl' espíritu 'naⁿyo' ñequio na m'aaⁿl' n'om'yo', ²⁴ ndo' na c'omxcondyo' cha'cwijom ts'aⁿ na macwee liaa xco na juu jo' cwiluiñena' cantyja na l'ue ts'om Ty'ōots'om na cwiwitquioo' jo' quia na mach'ee ts'aⁿ na maty'iomyana' ndo' lju' wjaam'aaⁿ.

²⁵ Jo' chii tacalaneiⁿyo' cantu, cwii ndo' cwi-indyo' catseineiⁿ ñ'oom na mayuu' ñ'eⁿ nc'iaa' ee

cha'tsondyo cwiluiindyo cwii cwii nnom ljo' na tjacañjoom'ñe sei' Cristo.

26 Quia matsei'w'ii' x'ia', tintseitjoondyu'ti' nnoom na jndaa'jom nntseicamaaⁿndyu' na tincja'cwaaⁿya' jom. 27 Tiñenquia'yo' meiⁿcwii nnom na tsaⁿjndii nnda^a nnts'aaⁿ xjeⁿ 'o.

28 'Ñeeⁿ 'o na ñex'uee, je' tanch'ueeti, je' cats'aayaaⁿ ts'iaaⁿ na yati cha nncuaa ljo' na nnda^a nnteijneiⁿ nt'omcheⁿ na matseitjoona' joona.

29 Meiⁿcwii ñ'oomntjeiⁿ talaneiⁿyo', macanda calaneiⁿyo' ñ'oom naya na nnteijndeina' ts'aⁿ na nncjaawijndeityeeⁿ, ndo' nn'aⁿ na nndye ñ'oom'ñeeⁿ nntio'naaⁿñena' joona. 30 Ndo' til'a'yo' cwii nnom na nntseichjoo'na' ts'om Espíritu Santo na cwiluiiñe Ty'o^ots'om, nguii na ñequio juu ty'ioom sayo 'o, cha jndaa' 'ñeeⁿ 'o xuee quia na nnlui'n'maaⁿndyeñ'eⁿ nn'aⁿ.

31 Ca'ndye'yo' cha'tso nnom na cwil'a na matsei'ndaa'na' n'om'yo', cha'na nntseiw'ii' ts'aⁿ x'iaaⁿaⁿ, nntseiloo'ñe ts'aⁿ ñ'eⁿ x'iaaⁿaⁿ, c'uaa c'uaati 'ñom na matseijmeiⁿ'ñê nnom x'iaaⁿaⁿ, maju' ts'aⁿ ñ'oom wi' nacjoo' x'iaaⁿaⁿ, ñequio chatso nnom ljo' na tis'a. 32 Cal'a'yo' na ya nn'aⁿndyo' ñ'eⁿ nc'iaa'yo', c'oom na wi' n'om'yo' joona, cala't'maⁿ n'om'yo' nc'iaa'yo' cha'xjeⁿ mati matseit'maⁿ ts'om Ty'o^ots'om 'o nc'e Cristo.

5

Luaa macaⁿna' na c'om ntseinda Ty'o^ots'om

1 Nc'e na cwiluiindyo' ntseinda Ty'o^ots'om na m'aaⁿ na jeeⁿ candya' ts'oom 'o, jo' na macaⁿa

na calui'ndyo' cha'xjeⁿ nqueⁿ. ² C'om'yo' na jnda nqui'u'yo' meiⁿquia nn'aⁿ cha'xjeⁿ Cristo ty'oom na candya' ts'oom jaa, ndo' tquiaañê na tueeⁿeⁿ cwentaaya. Ndo' na ljo' s'aaⁿ s'aana' ntyjii Ty'o^oots'om ñ'eⁿñê cha'cwijom catsmaⁿ na cwila'cuee' nn'aⁿ judíos cha nntseit'maⁿ ts'oom joona jnaaⁿna. Manc'e jo' chii tío na jeeⁿ tjawee' ntyjii Ty'o^oots'om ñ'eⁿñê cha'cwijom cwii jndye cachi.

³ Sa^a quii'ntaaⁿ 'o na cwiluiindy'o' nn'aⁿ cwen-
taa' Ty'o^oots'om ticatsona' meiⁿ cwe' na nlaneiⁿ'yo'
ñ'oom cantyja 'naaⁿ na cwe' nnc'oomya ts'aⁿ ñ'eⁿ
x'iaa' ndo' cha'tso nnom ñ'oomtia, oo aa queeⁿ
ts'om ts'aⁿ na ñe'cwityañê. ⁴ Ticaty'iomna' na
nlaneiⁿ'yo' meiⁿquia nnom ñ'oom ntjeiⁿ oo ñ'oom
wi', oo ñ'omjnaaⁿ na cwila'neiⁿ nn'aⁿ. Nchii
jo' na nl'a'yo'. 'O cjaañjoom' n'om'yo' cwii cwii
nnom na cantyja 'naaⁿ joo jo' ñe'quia'yo' na
quianl'uaa' Ty'o^oots'om. ⁵ Ee manqui'u'yo' na
juu ts'aⁿ na cwe' nnc'oomya ñequio x'iaa' oo na
nntseiqueeⁿ ts'om na ñe'cwityañe, jo' jo' matsei-
jomna' cha'na quia na matseit'maaⁿñe ts'aⁿ cwii
na cwe' nn'aⁿ nl'a, ndo' na ljo' nntseicu'na' na nnc-
jaaquiee' tsaⁿñeeⁿ cantyja na matsaⁿntjom Cristo
ñ'eⁿ Ty'o^oots'om. ⁶ Meiⁿcwii ts'aⁿ tinquio'nn'aⁿ'yo'
na ndu'yo' ñ'oom ntjeiⁿ nnom, ee macwe' jnaaⁿ
jo' juu na t'maⁿ nntseiw'ii Ty'o^oots'om nnt'uiina'
nn'aⁿ na tilañ'oom'ndyena chiuu na matseicañeeⁿ
joona. ⁷ 'O til'a'yo' cha'xjeⁿ na cwil'ana.

⁸ Ee 'o jnda ñet'om'yo' cantyja 'naaⁿ na
jaaⁿñe sa^a je' na jnda seitjoom'na' 'o ñequio Ta
Jesucristo, c'om'yo' cantyja 'naaⁿ naxueeñe,
⁹ ee juu naxueeñe quia na matseixueeña'

naquii' ts'om ts'aⁿ, mach'eena' na yats'aⁿñê, xcwe mach'eeⁿ ndo' mayom'm ñ'oom na nntseineiⁿ.
 10 Cala'jnda'yo' na nntsawi'naⁿyo' na nl'a'yo' cha'tso yuu na macjaawee' ntyjii Ta Jesús ñ'eⁿndyo'. 11 Ticala'jomndyo' ñequio ljo' na tjaa yuu l'ue na cwil'a nn'aⁿ na m'aⁿ cantyja 'naaⁿ na jaaⁿñe. 'O cala'canooⁿyo' na tixcwe ljo' cwil'ana. 12 Ee mach'eena' na jnaaⁿ ts'aⁿ na nntseineiⁿ ljo' na cwe' nty'iu cwil'a naⁿñeeⁿ, 13 saã quia na jnda seicanooⁿ naxueeñe cha'tso ljo' na cwe' nty'iu cwiluii, quia jo' cwiwitquioo'ya. Ee juu naxuee matseicanooⁿna' cha'tsoñ'eⁿ ljo' na wanty'iuu' niom. 14 Cantyja 'naaⁿ luaa', luaa matsona':

Calcwi' 'u na watsu',

quicantyja' na wa' qui'ntaaⁿ l'oo

cha na ñnequiaa Cristo na xuee nnc'oom'.

15 Cantyja 'naaⁿ nmeiⁿ cal'andyo' cwenta cantyja chiuu waa na tsam'aⁿyo'. Tinc'om'yo' na cwe' tijndo'to n'om'yo', 'o c'om'yo' na jndo'ya n'om'yo'. 16 Jo' chii queⁿndyo' na nl'a'yo' yuu na maty'iomyana'. Meiⁿ tila'catsuu'yo' xuee 'naⁿyo' na cwe' chutindyo, ee cwii cwii xuee jaawiwi'ti. 17 Til'a'yo' cwii nnom na cwe' nl'a'to'yo', cala'noⁿya'yo' ljo' l'ue ts'om Ta Ty'ooots'om na nl'a'yo'. 18 Tinc'om'yo' na candye'yo', ee na luaa' nl'a'yo' wjaachuna' 'o na nntsuundyo', 'o c'om'yo' na too'ndyo' ñ'eⁿ Espíritu Santo. 19 Cala'naⁿyo' ñ'oom na cho salmos na ndye'yo' ñ'eⁿ nc'iaa'yo' ndo' cata'yo' cha'tso nnom na ya nnta ts'aⁿ na cwila't'maaⁿndyo' Ta Ty'ooots'om ñequio na xcwee'ya n'om'yo'. 20 Ñequii'cheⁿ quia'yo' na quianl'uaa' Tsotyaaaya Ty'ooots'om cantyja

cha'tsoti na matio'ñaaⁿñê 'o ñequio xuee' Taya Jesucristo.

Ñ'oom cantyja 'naaⁿ nn'aⁿ na t'unco.

²¹ Catue'ndyo' cje'yo' ndaa nc'iaa'yo' na cwila'yu' nc'e na t'maⁿñe Ty'o^ots'om nquiu'yo'.

²² 'O yolcu na m'aⁿ s'aa'yo' cal'a'yo' ljo' na l'ue n'omna cha'cwijom cwindye'ntjom'yo' nnom nquii Ta Jesucristo. ²³ Ee tsaⁿs'a cwiluiiñê xqueⁿ scoom'm, cha'xjeⁿ Cristo cwiluiiñê xqueⁿ tmaaⁿ nn'aⁿ na macwji' Ty'o^ots'om cwentaaⁿaⁿ ndo' na macwji'n'maaⁿñê tmaaⁿñeeⁿ, ee cwiluiiñena' seiiⁿeⁿ, ²⁴ ndo' cha'xjeⁿ t'maaⁿ nn'aⁿ na cwila'yu' maju'ñecje nnom Cristo, maluaa' macaⁿna' na joo yolcu na jnda t'unco catuee'ndyecjena ndaa s'aana.

²⁵ Naⁿnom na m'aⁿlcuu c'omna na jnda nquiuna joo cha'xjeⁿ Cristo ty'oom na candya' ts'oom tmaaⁿ nn'aⁿ na macwji' Ty'o^ots'om cwentaaⁿaⁿ ndo' na tquiaañê na tueeⁿeⁿ cwentaana. ²⁶ Luaa' s'aaⁿ cha na nntseixmaⁿ tmaaⁿñeeⁿ cwentaa' Ty'o^ots'om ndo' tqueⁿ ljoom'm juuna' quia na teits'oomndyena ndo' ñequio na tyondyena ñ'oom'm, ²⁷ cha ññequiaa cheⁿnqueⁿ tmaaⁿñeeⁿ nnoom na neiⁿncoo' caxuee tseixmaⁿna', na tjaa yuu na cwajndii cantyja 'naaⁿna' meiⁿ tjaa'naⁿ na cantseiiⁿna' meiⁿ tjaa cwiicheⁿ na nljei' na ticuaaya cantyja 'naaⁿna', na ñequii'cheⁿ tseixmaⁿna' cwentaa' Ty'o^ots'om ndo' candaa'ñ'eⁿ matseixmaⁿna' cwentaaⁿaⁿ. ²⁸ Maluaa' waa na matsona' na c'oom tsaⁿs'a na wi' ts'oom scoom'm cha'xjeⁿ jnda ntyjeeⁿ seiiⁿeⁿ. Ee ts'aⁿ na wi' ts'om scuu' ma'moⁿ na jnda ntyjiiñe cheⁿnquii. ²⁹ Ee tjaa 'ñeeⁿ quich'ee na jndoo'ñe cheⁿnquii.

Macwaaⁿaⁿ nantquie cha nnc'oom na yaaⁿaⁿ. Ndo' cha'xjeⁿ Cristo mach'eeⁿ cwenta jaa tmaaⁿ nn'aⁿ na macwji' Ty'o_ots'om cwentaaⁿaⁿ, maluaa' matseijomna' na cateix'ee ts'aⁿ scoom'm. ³⁰ Ee jaa tmaaⁿ nn'aⁿ na macwji' Ty'o_ots'om cwentaaⁿaⁿ, cwiluiindy_o seii' Cristo na cha'waañê. Ndo' cwii cwiindy_o matseijomna' cwii cwii nnom na matseicañjoom'na' jom. ³¹ “Jo' chii tsaⁿs'a n'ñeeⁿ tsotyeeⁿ tsoñeeⁿ cha na nntseitjoom'na' jom ñ'eⁿ scoom'm ndo' wendyena nla'xmaⁿna ñecwii ts'aⁿ.” ³² Jeeⁿ t'maⁿ matseixmaⁿ ñ'oomwaa' na jeeⁿ wanty'iuu' waana'. Saa ja matseijoom'ndy_o ñ'oommeiⁿ cantyja 'naaⁿ Cristo ñequio tmaaⁿ nn'aⁿ na macwji' Ty'o_ots'om cwentaaⁿaⁿ. ³³ Saa ñ'oom na macanda, cwii ndo' cwiindy_o 'o c'oom na jnda ntyjii scuu' cha'xjeⁿ na jnda ntyjiiñe cheⁿnquii ndo' mati 'o naⁿlcu cala'l'uee'ndy_o s'aa'yo'.

6

Luaa macaⁿna' na c'om nda nn'aⁿ na cwila'yu'

¹ 'O yonch'u, nc'e na cwila'yu'yo' ñequio Jesucristo, laxmaⁿyo' na c'om'yo' na ndyaandy_o jo ndaaⁿ nn'aⁿ na nda o' ee maty'iomyana' na nl'a'yo' naljo'. ² Ee ljeii najndyee na matsa_nntjomna' chuna' ñ'oom na tso Ty'o_ots'om na nnts'aaⁿ. Matsona': “Catseit'maaⁿndy_u' tsoty^e ñ'eⁿ tso'ndy_o' ³ cha na nnc'oom' na neiⁿ ndo' tco xueechu' nnom tsjoomnancuewaa.” ⁴ Ndo' 'o je', na m'aⁿ nda'yo' til'a'yo' cwii nnom na nla'l'ioo'ndyena, 'o cala'quie'yo' jooa ñequio ñ'oom na matseijndo'na' n'omna chiuu nnc'omna ndo' cat'moⁿyo' ndaana na candya' ts'om Ta Jesucristo jooa.

Ñ'oom cantyja 'naaⁿ nn'aⁿ na teil'uandye na cwindye'ntjomtyeⁿ

⁵ 'O nn'aⁿ na teijndandyo', c'om'yo' na ndyaandyo' ndaa patrom 'naⁿ'yo', catue'ndyo'cje'yo' ndaana ndo' ñequio na nquia'yo' cala't'maaⁿ'ndyo' jooa ñequio na xcwee' n'om'yo' cha'xjeⁿ nquiu'yo' na cwindye'ntjom'yo' nnom nquii Cristo. ⁶ Nchii cwe' quia na jndoo'na jo' na cwiqueⁿ'ndyo' ts'iaaⁿ na cwil'a'yo'. 'O cal'a'yo' na ljo' ee na manquiu'yo' na nnom nquii Cristo m'aⁿ'tyeⁿ'yo' moso, ndo' ñequio na xcwee' n'om'yo' cwil'a'yo' yuu na l'ue ts'om Ty'o^ots'om. ⁷ Ts'iaaⁿ na nl'a'yo', cal'a'yo' juuna' ñequio na tinc'uaa' n'om'yo', cha'xjeⁿ nnom nquii Ta Jesucristo na cwindye'ntjom'yo', nchii cwe' ndaa nn'aⁿ.

⁸ Ee manquiu'yo' na cwii cwii ts'aⁿ, aa m'aaⁿ'tyeeⁿ moso oo aa m'aaⁿ xjeⁿ 'naaⁿ' nqueⁿ, saa Ta Jesús ññequiaaⁿ na nnc'o'ñom cantyjati na ya na ñes'aa. ⁹ Ndo' 'o je' patrom, majo'ti cal'a'yo' ñequio nn'aⁿ na m'aⁿ'tyeⁿ moso 'naⁿ'yo' meⁿ nchii na ndu'yo' cwii ñ'oom na ntseicaty'uena' jooa. Ee cjañjoom' n'om'yo' na 'o ñ'eⁿ'ndye jooa cañoom'luee m'aaⁿ Ta Jesús na matsa'ntjoom jaa. Ndo' jo nnom jom ñecwii xjeⁿ cwila'xmaaⁿya.

L'o ts'iaaⁿmeiⁿ cwil'uee'ndyo

¹⁰ 'O nn'aⁿya, Ta Jesús tjacantyja najndeii na matseixmaaⁿ. Cantyja 'naaⁿ' jo' c'oom' jndeii' n'om'yo' nc'e matseitjoom'na' 'o ñ'eⁿ'ñê. ¹¹ Cwil'uee'ndyo' cha'tso nnom l'o ts'iaaⁿ ndia' na jnda tquiaa Ty'o^ots'om ndaa'yo', cha na nndaⁿ nnaⁿ'ndyo' nacjoo' cha'tso nnom na manquiu'nn'aⁿ tsaⁿjndii 'o. ¹² Ee nchii cwe'

ñequio nn'aⁿ na la'xmaⁿ seii ñequio ndeii cwil'aaya tia'. Jaa m'aaⁿya nacjoo najnda na wi'ndye na titquioo' na m'aⁿ jo ndo' ljo'luee, joo na waa najnda na cwiqueⁿ xjeⁿ, na cwitsa'ntjom, ndo' nt'omcheⁿ na cwitsa'ntjom tsjoomnancue jaaⁿwaañe. ¹³ Jo' chii cwil'uee'ndyo' cha'tsoñ'eⁿ l'o ts'iaaⁿ cwentaa ndia' na mañequiaa Ty'o^oots'om cha quia na nncue'ntyjo xuee na wi' nntjom'yo' nnda^a nnaⁿndyo' ndo' na jnda jnda^a jnaⁿndyo' tia', ndicwaⁿ meiⁿntyje'tyeⁿ'yo'. ¹⁴ Cwintyje'tyeⁿ'yo' cwentaaⁿaⁿ na cwil'uee'ndyo' ñ'oom'm cha'xjeⁿ sondaro matseityeeⁿ xcweeⁿeⁿ ñequio tjaⁿ, cal'a'yo' na maty'iomyana' ee juuna' nncwañoom'na' 'o cha'xjeⁿ cotom xjo wañoom'na' sondaro. ¹⁵ Cha'xjeⁿ m'aaⁿc'eeñe sondaro na mañjoom lcoom'm na wjaⁿ tia', mati 'o ñequii'cheⁿ c'om'c'eendyo' na nntsancia'yo' ñ'oom na ya na mañequiaana' na cwiljoya ntyjii Ty'o^oots'om ñ'eⁿ nn'aⁿ. ¹⁶ Tsaⁿjndii majoom'm ndo nacjo'yo' na too' chom. Cha'xjeⁿ tjaⁿ tmeiⁿ mawañoom'na' sondaro na tinc'oom ndo jom, maluaa' cwil'uee'ndyo' juu na cwilayu'ya n'om'yo' cha nlandu'yo' ndo na maju' tsaⁿjndii nacjo'yo'. ¹⁷ Juu na macwji'n'maaⁿñe Ty'o^oots'om nn'aⁿ cwil'uee'ndyo' juuna' na nncwañoom'na' 'o cha'xjeⁿ tjaⁿxqueⁿ xjo' mawañoom'na' xqueⁿ sondaro ndo' mati cwil'uee'ndyo' ñ'oom'm cha'xjeⁿ xjo espada na mañequiaa Espíritu Santo ndaa'yo'. ¹⁸ Tintsacwintyje'yo' na cwilanei'yo' nnom Ty'o^oots'om cha'xjeⁿ na mañequiaa Espíritu Santo naquii' n'om'yo', ñequii'cheⁿ cala'ty'oondyo' ndo' cataⁿ'yo' nnoom, tincwintqueⁿ'yo', ñequii'cheⁿ na c'om'c'eendyo'

na calaneiⁿ'yo' nnoom cantyja 'naaⁿ nn'aⁿ na m'aⁿ cwentaaⁿ'aⁿ. ¹⁹ Mati calaneiⁿ'yo' nnom Ty'o^ots'om cantyja 'naⁿya na cateijneiⁿ ja ñ'oom na nntseinaⁿya nnda^a nn'aⁿ meiⁿ tintseicaty'uena' ja na ñnequiaya na caliu nn'aⁿ chiuu waa ñ'oom na jeeⁿ wanty'iuu' waa na nlui'n'maaⁿñe ts'aⁿ. ²⁰ Jnda ty'ioom ts'iaaⁿ ja na mañequiaya ñ'oom naya 'naaⁿ'aⁿ, ndo' cwe' jnaaⁿ jo' na m'aaⁿya w'aaⁿcjo, calaneiⁿ'yo' nnoom na c'oⁿt'maaⁿ'ndyo ts'o^ony^a na nntseinaⁿya juuna' ndaa^a nn'aⁿ cha'xjeⁿ matsona' na cats'aa.

Ñ'oom na jaantycwii na matseiljeii Pablo cartawaañe

²¹ Ti'nn'aⁿya Tíquico, tsaⁿ na jeeⁿ jnda ntyjiiya, jom jeeⁿ xcwee' ts'oom ts'iaaⁿ 'naaⁿ Ta Jesús, jom ntseicañeeⁿ 'o chiuu waa na m'aaⁿya cha caliu'yo' ljo' mats'aaya. ²² Cwe' jo' na majñooⁿya jom na m'aⁿ'yo' na catseicañeeⁿ 'o chiuu waa na m'aaⁿya ñjaaⁿ cha na ñnequiaana' na t'maⁿ n'om'yo'.

²³ 'O nn'aⁿya na cwila'y^u'yo', nquii Ty'o^ots'om na cwiluiiñê Tsotyaa^aya ñequio Jesucristo na cwiluiiñê na matsaⁿ'ntjoom jaa, quiana na nnda'yo' na meiⁿcwii ñomtiuu tic'om'yo' jo nda^ana ndo' na cato'ñoom'yo' na m'aⁿna na wi' n'omna 'o ee cwila'y^u'ya n'om'yo' ñ'eⁿndyena, ²⁴ juu naya na matseixmaⁿ Ty'o^ots'om, quiaaⁿ juuna' ndaa^a cha'tsondye nn'aⁿ na ticala'chuii' na m'aⁿ na jnda nquiu Taya Jesucristo.

Ñ'oⁿ xco na tq^en ty'o^ots'om cantxja 'naa'
Jesucristo
New Testament in Amuzgo, Guerrero
(MX:amu:Amuzgo, Guerrero)

copyright © 1999 Wycliffe Bible Translators, Inc.

Language: Amuzgo, Guerrero

Translation by: Wycliffe Bible Translators, Inc.

Amuzgo, Guerrero

amu

Mexico

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Amuzgo, Guerrero

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022

f19bf10d-b9f4-54f8-aa78-06ee36e6a7cd